

# Fundargerð 17. fundar

## siðanefndar sambandsins

Árið 2018, föstudaginn 14. desember kl. 10:00 kom siðanefnd sambandsins saman til fundar í Virkisbúð, Borgartúni 30 í Reykjavík.

Fundinn sátu: Sigurður Kristinsson, Erling Ásgeirsson og Anna G. Björnsdóttir.

Að auki sat fundinn: Helga Guðrún Jónasdóttir sem ritaði fundargerð.

Fundargerðin var færð í tölvu.

Þetta var tekið fyrir:

### 1. Erindi frá Reykjavíkurborg - 1809011SA

Málið varðar beiðni frá forsætisnefnd um almenn tilmæli siðanefndarinnar varðandi það þegar kjörnir fulltrúar gera starfsmenn sveitarfélaga að umtalsefni í opinberri umræðu. Umræðu um málið er haldið áfram frá síðasta fundi.

Fyrir fundinn lágu drög formanns að álitinu. Drögin voru yfirfarin og samþykkt með nokkrum breytingum. Í álitinu er komist að þeirri niðurstöðu að það sé almennt óheppilegt að kjörnir fulltrúar geri störf starfsmanna sveitarfélaga að umtalsefni í opinberri umræðu. Slík framkoma geti falið í sér brot á 1. mgr. 3. gr. siðareglna fyrir kjörna fulltrúa borgarinnar um að þeir eigi að sýna störfum og réttindum starfsmanna virðingu og virða verkaskiptingu í stjórnkerfi sveitarfélags. Framkvæmdastjóri sveitarfélags sé æðsti yfirmaður starfsliðs sveitarfélaga samkvæmt sveitarstjórnarlögum og hafi eftirlitshlutverk með einstökum starfsmönnum. Í álitinu eru einnig veittar leiðbeiningar um hvernig hægt sé að fyrirbyggja að slíkur ágreiningur á milli stjórnsýslu og kjörinna fulltrúa komi upp með opnum og jákvæðum umræðum um hugsanleg siðferðisleg álitamál og viðbrögð við þeim og með skýrum reglum um verkaskiptingu og málsmeðferð.

### 2. Erindi frá Hafnarfjarðarbæ - 1809011SA

Málið varðar ummæli kjörins fulltrúa um starfsmann bæjarins. Umræðu um málið er haldið áfram frá síðasta fundi.

Fyrir fundinn lágu drög formanns að álitinu. Drögin voru yfirfarin og samþykkt með nokkrum breytingum. Í álitinu er tekið fram að það sé almennt óheppilegt að kjörnir fulltrúar geri störf starfsmanna sveitarfélags að umtalsefni á samfélagsmiðli. Horfa verði þó til þess að kjörni fulltrúinn hóf ekki umræðuna, heldur brást við sjónarmiðum íbúa sem tjáðu sig á samfélagsmiðli um þjónustu bæjarins. Hér vegist á tvö sjónarmið: Annars vegar umboðshlutverk kjörins fulltrúa og eftirlit, fyrir hönd umbjóðenda sinna, með því að stjórnsýsla sveitarfélagsins standi sig í upplýsinga- og þjónustuhlutverki sínu; hins vegar skylda kjörinna fulltrúa til að virða verkaskiptingu, ganga ekki inn í eftirlitshlutverk framkvæmdastjóra með störfum einstakra starfsmanna og sýna störfum þeirra virðingu. Þar sem bæði sjónarmiðin séu gild verði ekki séð að ákvæði 3. gr. siðareglna kjörinna fulltrúa hjá Hafnarfjarðarbæ leiði

af sér ófrávíkjanlegt bann við því að kjörnir fulltrúar tjái sig á samfélagsmiðlum þar sem íbúar láta í ljós óánægju með þjónustu sem veitt er af starfsmönnum sveitarfélags. Hins vegar reyni slíkar aðstæður mjög á dómgreind og varfærni kjörinna fulltrúa. Þeir þurfa að muna að almennt er óheppilegt að þeir tjái sig opinberlega um störf einstakra starfsmanna og ef þeir víkja frá þeirri meginreglu þurfa ástæður að vera brýnar og sérstök aðgát höfð við að tjá sig málefnalega og án þess að vega að persónu og starfsheiðri einstakra starfsmanna.

### 3. Uppfærðar leiðbeiningar um gerð siðareglna - 1806010SA


Ekki vannst tími til að ljúka málinu. Var afgreiðsla þess frestað til næsta fundar siðanefndar, sem var ákveðinn mánudaginn 7. janúar 2019.


### 4. Önnur mál - 1806011SA

Engin önnur mál voru tekin á dagskrá.

Fundi var slitið kl. 12:00

  
\_\_\_\_\_  
Sigurður Kristinnsson

  
\_\_\_\_\_  
Erling Ásgeirsson

  
\_\_\_\_\_  
Anna G. Björnsdóttir